

**PENGAJIAN KITAB IHYA' 'ULUMIDDIN kali ke-16**  
**Kuliah Maghrib Abu Zulfiqar Al-Amsyari kali ke-100**  
**di Surau An-Nur, Kampung Sungai Nyior, Trong, Perak**



Ahli wara' dari ulama zahir mengakui kelebihan ulama batin dan mempunyai mata hati. Imam Asy-Syafi'i pernah duduk di hadapan Syaiban Si Penggembala, seperti duduknya seorang anak kecil di maktab, seraya bertanya : "Bagaimana membuat itu dan itu?"

Maka dikatakan kepada Imam Asy-Syafi'i : "(Nampaknya) Seperti engkau bertanya kepada badwi ini?" Maka jawab Imam Syafi'i : "Sesungguhnya ini bersesuaian dengan apa yang kami lupakan."

Imam Ahmad bin Hanbal dan Yahya bin Mu'in selalu pergi menemui Ma'ruf Al-Karkhi, padahal dalam ilmu zahir tidak ada orang lain yang setara dengan kedua-duanya. Imam Ahmad dan Yahya menanyakan : "Bagaimana?"

***Sedang Rasulullah saw pernah bersabda ketika ditanyakan : "Apa yang kami perbuat apabila datang kepada kami suatu persoalan yang kami tidak peroleh dalam Kitab dan Sunnah?"***

***Maka Nabi saw menjawab : "Tanyakanlah kepada orang-orang soleh dan selesaikanlah dengan jalan bermusyawarah dengan mereka."***  
(Thabrani, dipandang lemah oleh kebanyakan ahli hadith)

Kerana itulah dikatakan bahawa ulama zahir itu adalah hiasan bumi dan kerajaan, dan ulama batin adalah hiasan langit dan alam malakut.

Berkata Al-Junaid : “Guruku As-Sirri bertanya kepadaku pada suatu hari : “Apabila engkau berpindah daripadaku, maka dengan siapa engkau bercakap-cakap?”

Lalu aku menjawab : “Dengan Al-Muhasibi.”

Maka ia berkata : “ Ya, betul! Ambillah dari ilmunya dan adab kesopanannya. Tinggalkanlah dari engkau pemecahannya ilmu kalam dan serahkan itu kepada para ulama ilmu kalam sendiri (ulama mutakallimin).”

Kemudian tatkala aku berpisah, aku mendengar dia mengatakan : “Kiranya Allah menjadikan engkau seorang ahli hadith yang sufi. Tidak dijadikan-Nya engkau seorang sufi yang ahli hadith.”

Diisyaratkan oleh As-Sirri bahawa orang yang memperoleh hadith dan ilmu, kemudian bertasawuf, maka akan memperolehi kemenangan. Dan orang yang bertasawuf sebelum berilmu, maka akan membahayakan dirinya.

Kalau anda bertanya : “Mengapa engkau tidak membentangkan ilmu kalam dan falsafah dalam bermacam-macam ilmu itu dan anda terangkan bahawa kedua-duanya itu tercela atau terpuji?”

Ketahuiilah bahawa hasil yang dilengkapi padanya ilmu kalam ialah dalil-dalil yang bermanfaat. Maka Al-Quran dan hadith itu melengkapi padanya. Yang di luar dari Al-Quran dan Sunnah, maka adakalanya pertengkaran yang tercela dan ini termasuk perbuatan bid’ah, yang akan dijelaskan nanti. Dan adakalanya permusuhan yang menyangkut dengan parti-parti yang berlawanan. Dan merentang panjang dengan mengambil kata-kata yang kebanyakannya batil dan keliru, dipandang buruk oleh peribadi yang baik dan ditolak oleh telinga yang sihat. Dan sebahagiannya lagi campuran pada yang tidak ada hubungannya dengan agama. Bahkan tidak dikenal pada masa pertama dari agama.

Dan adalah turut campur padanya dengan keseluruhan termasuk bid'ah. Tetapi sekarang hukumnya telah berubah kerana telah muncul bid'ah yang menyeleweng dari kehendak Al-Quran dan Sunnah. Dan telah tampil suatu golongan yang mencampur-adukkan barang yang tidak jelas. Lalu mereka menyusun kata-kata yang tersusun, sehingga yang ditakuti itu memeperoleh keizinan kerana terpaksa. Bahkan telah menjadi sebahagian dari fardhu kifayah.

laitu kadar yang dihadapi oleh pembuat bid'ah. Dan yang demikian kepada batas yang tertentu, akan kami sebutkan nanti pada bab yang akan datang, insyaAllah Ta'ala.

## SEIMBAS LALU PELAJARAN KALI INI

### **Siapakah Imam Syafi'i?**

Orang yang mengasaskan Mazhab Syafi'i.

### **Siapakah Imam Ahmad bin Hanbal?**

Pengasas Mazhab Hanbali. Anak murid kepada Imam Syafi'i.

### **Ulama-ulama sufi yang disebutkan kali ini:**

1. Syaiban
2. Ma'ruf al-Karkhi
3. Junaid al-Baghdadi.
4. Sirri as-Saqti.

Imam Al-Ghazali menulis dalam kitabnya Al-Munqiz min Adh-Dhalal :  
*“Aku mula menimba ilmu-ilmu mereka dengan mengkaji buku-buku seperti kitab Qutubul Qulub karangan Abu Talib Al-Makkiy, kitab-kitab karangan Al-Harith Al-Mahasibiy serta pelbagai warisan dari Al-Junaid, dan Asy-Syibli dan Abu Yazid Al-Bustami.”*

### **Apakah ilmu kalam?**

(Antara cirinya ialah) Ilmu yang menggunakan dalil-dalil akal fikiran dan kata-kata dalam mencari kebenaran. Contohnya golongan Asya'irah, Maturudiyah, Mu'tazilah, Murji'ah, Qadariyyah, Jabbariyah dan lain-lain.

### **Baguskah ilmu kalam?**

Bagus. Cuma kita jangan hanyut di dalamnya sehingga mengabaikan ilmu tasawuf. Juga jangan hanyut dalam perjidalan/ perdebatan yang menjadi budaya ilmu kalam kerana akan menghabiskan banyak masa dan tenaga.

Al-Ghazali menulis tentang ilmu kalam dalam Al-Munqiz :

*“Kemudian aku memulakan kajian menerusi ilmu kalam.”*

*“Ilmu yang baik tetapi tidak memuaskan kehendakku.”*

*“Kebanyakan bidang perbincangan mereka berlegar dalam soal-soal untuk menentang hujah musuh, dan membatalkan beberapa teori mereka bersesuaian dengan penerimaan mereka.”*

*“Bagiku ilmu kalam masih belum cukup dan ia tidak dapat mengatasi penderitaanku selama ini.”*

## SEIMBAS LALU PELAJARAN YANG LEPAS

**Apakah ilmu-ilmu yang menjadi jalan ke akhirat?**

1. Ilmu mukasyafah
2. Ilmu mu'ammalah

**Apakah ilmu mukasyafah?**

Ilmu perihal batin.

**Apakah ilmu mu'ammalah?**

Ilmu perihal jiwa/ hati.

**Apa akan berlaku sekiranya kita tidak ada walau sedikit daripada ilmu mukasyafah?**

Dikhuatiri akan buruk kesudahan kita.

**Bagaimana kita sebagai orang awam ini mahu selamat daripada kesudahan yang buruk?**

Sekurang-kurangnya :

1. Kita mengakui kewujudan ilmu ini.
2. Kita hormati ahli-ahli dalam ilmu ini.

Insyallah selamat.

**Mengapa ada orang yang tidak yakin akan ilmu mukasyafah ini?**

Kerana hati mereka mencintai dunia dan selalu menurut hawa nafsu, walau sebanyak mana ilmu mereka.

**Apakah 2 isi/pelajatan utama dalam ilmu mu'ammalah?**

1. Sifat-sifat mahmudah.
2. Sifat-sifat mazmumah.

**Apakah sifat-sifat mahmudah?**

Sifat-sifat yang baik lagi terpuji pada syarak.

**Apakah sifat-sifat mazmumah?**

Sifat-sifat yang buruk lagi dikeji pada syarak.

**Apakah kedudukan ilmu ini untuk kita?**

Fardhu 'ain. Mesti dipelajari oleh setiap individu umat Islam.

**Apa kesannya jika kita tidak mempelajari ilmu fardhu 'ain?**

Berdosa.

**Antara fardhu 'ain dengan fardhu kifayah. Manakah yang mesti didahulukan?**

Fardhu 'ain.

